

Kalenjin Heart book

MUGULELDAB CHI



COPYRIGHT

ISBN 978 - 1 - 920322 - 45 - 8

E-MAIL: info@angp.co.za

ALL NATIONS GOSPEL PUBLISHERS
Posbus 2191, PRETORIA, 0001, R.S.A.

(A Gospel Literature Mission financed by donations)
(Reg. No. 1961/001798/08)

MUGULELDAB CHI

ANAN

KO KEERETAB MUGULELDO ENG' TOOGUNETAB TAMIRMIRIET

(Kaborunetab Konetisiet Kobun Itonwek Taman)

Kigichobune bukuini ming'in emetab France eng' kenyitab 1732, kigiror ak kesir kogeny agobo boisetab amdaet eng' korotinwekab Afrika, kochobei Rev. J.R. Gschwend eng' kenyitab 1929, ak kigiweech ak kebir eng' kutuswek che chang' eng' chamjinetab All Nations Gospel Publishers, che igoitoi betusiechu eng' emotinwek che chang' che kiamdae Logoiywek che Miach. Kindochin eng' bukuini ming'in bik che bo kutuswek tugul, sobet, ak kayanosiek, konai imanitab orit ne bo tamirmiriet ak kamanutietab ng'olyot ne bunu Jehovah konyonjin chi ko u ye kimwau eng' maotiot Esekiel, eng'kenyisiek 586 ye kitomo kesich Kristo, "Agonok kogeny muguleldo ne leel, ak andeok tamirmiriet ne leel... ak oegu bikyuk, ak aegu Kamuktandeng'wong'." Esekiel 36:26-28.

DOWNLOAD BOOKLETS: www.angp-hb.co.za

ORDER FREE LITERATURE: info@angp.co.za
page 1 of 23 pages

MUGULELDAB CHI

HEKALUTAB JEHOVAH ANAN KO OLE BOISIE SETANI (1 Johana 3:4-10)

Ye isomani bukuini, inai ile u kioit ne imuchi igeerege. Ngo ma i kayanindet anan ko i Kristianin, ne ma iyani Kristo anan ko ne kigochuchuigei, igeerege ko u ye keerin Jehovah. "Keerei bik itonda, ago keerei Jehovah muguleldo" (1 Sa 16:7). Keerech Jehovah ko u ole ki u iman.

Setani ko kwanda ne bo lembechek tugul. Inendet ko bounindet ne bo mesundeito ak ko cheptalelitab ng'onyuni, ne walegei inendet koek malaikaiyatab lapkeiyet si kondochi murenik ak kobogorisiek komaasta. Mitei betusiechu che chang' che kiyoktoi, che bo lembech, che walegei koek che kiyoktoi che bo Kristo. Ama mi kwong'et, amu walegei Setani inendet koegu malaikaiyatab lapkeiyet (2 Kor. 11:13,14). Kertoi Setani, ne cheptalelitab ng'onyuni, bik eng' mesundeito si ma imuch kogeer kole, chamei Jehovah ichek anan kole, kime Jesu si kosor ichek (2 Kor. 4:4). Begunotin eng' tamirmiriet ak ko koriotin eng' naetab Jehovah kiptengeginik tugul ak icheget che ma iyani. Bou ichek yaitietab ng'onyuni (Epe. 2:1-2). Tokyingei ichek ng'emisiet ne bo koigeny kobate kityo koyotagis konyekwak eng' oret ne tokyingei ng'emisienywa. Chito ne mwaei kole. 'Tomo ayai tengek' ko kenegei inendet. Amu, "Kigeng'any Weritab Jehovah amu noto, si kobiit kong'em boisionikab oindet" (1 Johana 3:8). "Noto anyun, oming'inityige Jehovah; ago ogirinde oindet, si komweenok. Orikyi Jehovah, si korikyok" (Jakobo 4:7-8).

Ye isomani bukuini ak inetige pichainikyik, imuchi igeer muguleldang'ung'. Chamji lapkeiyetab Jehovah ne bo kasiaget koborun ole u muguleldang'ung'. Iyan tengekwoiguk amat iesie ile mitei, amu mwawech Ng'olyotab Jehovah kole, "Ngot kemwa kele magitinye tengek, kegenege, ama mi imanit eng' achek. Ngot keng'anye tengekwoigyok, koyanat ak ko bo imanda konyoiywech kaat tengekwoigyok, ak kotililech eng' kiy tugul ne ma bo imanda" (1 Johana 1:1-10). "Ak kotililech korotikab Jesu Werinnyi eng' tengekwoigyok tugul".

Boun Setani ana ko Jehovah; i otwogindetab tengek anan ko kiboitotab Jehovah. Ngot kobou tengek sobeng'ung', ko mat iesie, ago rirji Jehovah. Itiachin Inendet eng' Jesu Kristo ne kinyo ng'onyuni si kosor kiptengeginik, si kong'em kimnatetab Setani ak tengekto ne boiywech. Inendet ko Yetindennyo. Imite taitab Jehovah ne tilil ne ingen ung'otik tugul, kabwatutuk che ung'otin ak yautikab sobeng'ung'. Maimugakse iunyge inyendet ak yautiguk eng' Jehovah, amu "Tos inendet ne kiyaei itit, ko magastoi? Tos inendet ne kiyaei konyek, ko mageertoi?" (T. Kal 94:9).

"Bendoti konyekab Jehovah eng' ng'ony komugul, kobortogei kole kim agobo icheget che igesunotgei mugulelwekwak eng' tainnyi" (2 A. Bet 16:9).

"Amu keerei konyekyik ortinwekab chi, Ak kogeerei banwekyik tugul. Mami mesundeito, anan uruetab meet, Ole imuchi koungegei yaikab tengekto" (Job 34:21,22).

"Ago kima chamdagei Jesu, amu kiingen bik tugul" (Johana 2:24).

"Igasatgei ne kigenyochi kaat bistoennyi, ne kigetuch chalwoktany. Baibai mising' chi ne maiityin Jehovah tengekto, Ama komi ng'alset muguleldanyi" (T. Kal 32:1-2).

Kaborunetab Pichainik
PICHAIT NE BO TAI

1. MUGULELDAB CHI NE KIPGTENGEKYO



Iboru pichaini agobo muguleldab muren anan kobogorio ne bo ng'onnyuni, ne kiptengekyo, ne kimwaei eng' Bukuit ne Tilil ko kiptengekyo, noto ne bou yaitietab ng'onnyuni ak magutik koboto magutik che laldos che bo biteetab chi. Nito ko pichait ne bo iman ko u ye keerei Jehovah.

Ng'alale konyek che biriren bogitet ko u ye kimwaei eng' Kalewenaik 23:29-33: "Ng'o ne rirei kole, Bwa? Ng'o ne arogeni? Ng'o ne bolei? Ng'o ne ing'unyng'unyi? Ng'o ne kigiguoten buch? Ng'o ne biriren konyek? Ichek che eei divaik agoi; ichek che cheng'oti maiyek che burugotin. Ameiit maiyek ye kagobiriritu, ye toogu itondanyi eng' kikombet, ye rektoi komie: eng' let kosus ko u erenet, Ak kouut ko u melmeldo. Keerei konyeguk karusiek, Ak komwa muguleldang'ung' tuguk che imaasotin".

Eng' kelutab metit eng' pichaini, kimuchi kegeer muguleldab chi ko nyiitat tióng'ik che terjin che ng'alale chang'indab tengekwojik che terjin che mi muguleldab chi, ko u ye muguleldo ko kwenut ak ko ole iunegei tengekwojikyok. Mwawech Jehovah

kobun kutitab maotiondennyi Jeremia kole, "Kaberberindet muguleldo kosiir tuguk tugul, ak ko ya mising': ng'o ne imuchi konai?" (Jeremia 17:9).

Igimiti nito Jesu Inendet ye mwaei kole, "Amu mong'une orit, eng' muguleldab chi, kabwatutik che yaach, sokset, chorsosiek, rumisiosiek, ibetab ge, kasetab miat, yaitiet, ng'alset, maget ne ya, kong ne ya, ng'alek che yaach, menotet, ak berberindo: mong'une orit tuguchuto tugul yaachen ak kong'wanit chito" (Mariko 7:21-23).

1. TARIT NE U MEREWET. – Ko u ye chamei chi tugul kororonindab taritiani u merewet, kong'alale eng' yu, eng' muguleldab chi agobo losetab ge. Setani, ne ki kerubindet ne kigiil ne kiiuurisiei ne bo Jehovah, ko kiibut eng' boisiennyi amu losetab ge ak koek bunyotab Jehovah, inendet oindet (Isaia 14:9-17; Esekiel 28:12-17).

Mong'une losetab ge kwenutab *Gehenna, ak koborfugei eng' ortinwek che chang'. Losegei bik alage magornatosiekwak, oindab somanenywa; kalagutikab lelesta che ibortoi borwekwak

amelilandos; kalaagetab chepchingilok, sirimwek, tamogok, ak alak, ko u ye kigibor kotook komie eng' Isaia 3:16-24. Losegei alage kwansiekwak che bo keny, bororiet, biteet, ureriet, ak alak, koutie kole, "Kirindoi Jehovah menotik, ak kogochin mieindo che iming'inegei" (1 Petero 5:5). Wechei Jehovah losetab ge ka kaeetab ge (Kalewenaik 8:13). "Indoe menotet ng'emisiet, ak indoe kachaunetab ge kabutet" (Kalewenaik 16:18).

2. SESET. – Seset ko kaborunet ne bo magutikab borto, sokset ak ibetab ge. Tengekwogichuto kagemwa eng' yu ko kogotesak egosiechu, ago eng' betusieheb let mising', ne kanyoljech kiyan imanit ne bo ng'alekab Jesu che kiisib komwa eng' kenyisiek che siirei elfusiek aeng'; che kigosirto, noto tun igeitu betusiek che bo let betusiek che ki bo Sodom ak Gomora. Ma kele kityo kigonyonji oraneb sobetab tengek murenik ak kobogorisiek ak konyonji gorikab bik che bo kayanet, skulisiek che terjin ak gorikab toek, ago mong'jin mugulelwekab bik yaitioni eng' oretab ng'alset ko mami tewernata, kobun kaborunoikab sinema, gorikab ureriosiek, bukuisiek che yaachen, ak eng' ortinwek alak che chang', che choto kuure Jehovah tengek kegeerei ko u ne sobetab betusiechu. Teechei milionisiekab bik che mengechen kabwatenywa ne bo sobet ne mi barak eng' sinemaisiek ak bukuisiekab ationdonik, ne eng' let kobutyi ichek nyalilda, tewernatet ak ndara. Murenik ak kobogorisiek che yaikab ibetab ge amatinyei ribetab ge koegu nyigonik eng' ibinda ne isubu ichek. Gorikab ureriosiek agichek ko ole iunegei kotugul ibetab ge. Ma kenamei nyigonikab tililindo che u Josep ak alak koek kaborunet (Taunet 39). Agot bororiosiek che kiimuchi eng' bitonwekwak che bo keny kobar murenik ak kobogorisiek che kiyaei ibetab ge ko temuchi konet kiy ibinita nyo ak kogikyech eng' betutab kiruoget. Mwawech Jehovah kole ama kiyai ibetab ge ago keistoeye. "Omwee ibetab ge. Tengek age tugul ne yaei chi komitei sang'utab borto; ago inendet ne yaei ibetab ge koyachin bortanyi tengekto. Anan, tos mongen ole borwekwok ko hekalut ne bo Tamirmiriet ne Tilil ne mitei eng' okwek, ne otinye eng' Jehovah? Ama o bo ge okwege" (1 Kor. 6:18,19). "Ak ngo ng'em chi age tugul hekalut ne bo Jehovah, kotun ng'emei Jehovah inendet; amu tilil hekalut ne bo Jehovah, okwek noto" (1 Kor. 3:17).

3. TORET. – Ng'alali toret agobo tengekwogikab bogitet ak keiyandit. Nito ko tiondo ne tinyei simdo ne amei kiy age tugul ne mi tainnyi, ngo tilil anan ko muruon; ak ko u noto muguleldo ne bo tengek, amei kabwatut age tugul ne muruon, kaboruno, iton ak alak. Borto, ne kigichob koek hekalut ne bo Jehovah ne sobei, keyaei komuruonit eng' amitwogik che ng'wonen ak atebosiek che muruonen ko u kulet ak mumuletab tomotet koboto kerichokab bogitatet ak alak. Kigochut murenik ak kobogorisiek atebet ne bo kuletab tomotoinik ak "kerichokab bogitatet" kosiir betusiek che bo tai. Imuchi kimnatetab Jehovah inegei kotiach kulikab tomotoinik che u choto che nyalildos, che ratotin ak ko otwogikab oindet. Indoi bik alage ng'atutiet eng' kayanenywa kole, ma kigulei tomotet eng' gotab kanisa, kobwati kole tagisiet eng' Jehovah, ago eng' iman ko maibwati hekalut ne bo Jehovah, ne noto borwekwak. Mwaei Paulo ne Kiyoktoi kole, "Mongen okwek ole o hekalut ne bo Jehovah, ak menyok Tamirmirietab Jehovah? ak ngo ng'em chi age tugul hekalut ne bo Jehovah, kotun ng'emei Jehovah inendet" (1 Kor 3:16,17; 6:18,19).

Chito ne kipkeiya ko nyiitat weget anan ko matilei kiy eng' taitab Jehovah. Kiamisie si kobiit kesopche; ma kisoptosi si kobiit keamisie. Kimuchi keisto rubet ye kiam amdit komugul, ago waachei keiyandit kotugul kolen, "Konu, konu!"

Mabiyonyi keiyandit, ma nyiiei kiy. Mwaei ng'atutiet ne bo keny kole kilachei kipkeiyat ak kibogitiot kot kome (Ne K. Ng'a 21:18-21). "Amu egu bononik kibogitini ak kipkeinik: Ak ilaakyin ruondo chito mararenik" (Kal 23:21). Ibwat ile kimi chi age ne ki magorio, ne ki kipkeiya ak ko otwogetab magutikyik, kime ak kwo inendet oldab mat ak konyor ng'wanindo ne o mising'. Ma

tia kemwaei mising' yaietab eiset. Naat kele ma kimage kiy mising'. Mwawech Jehovah eng' Ng'olyondennyi kotook komie kole mami kibogitio ne nyoru Bounatetab Jehovah. Ma amit maiyek, ago eiso ne ibeeti ak kong'emei kabwatet, si eng' ichek che eei koyaei abusnatet. Yaagitu ichek kot kobaris ak korumgei ichegei, kit ne koma ta yaei ichek. "Chotindet divaik, bolindet maiyek; Ak ma ng'om age tugul ne betei eng' maiyek" (Kal 20:1).

Icheget che chobei ak koaldoi maiyek kotinyei kiruoget eng' taitab Jehovah, amu mwaei Jehovah kole, "Bwa eng' ichek che koromen koe divaik, ak murenik che kimen che buruchi maiyek" (Isaia 5:22). "Bwa inendet ne igochin chitab kokwennyi maiyek, inye ne itesyini ng'woneng'ung', ak igochini kogeny kobogit, si kobiit igeer ichek komi ach ngor" (Hab 2:15). "Anan mongen ole matun nyoru icheget che ma bo iman bounatetab Jehovah? Amat kiberberak: mami eng' che soksei, anan che saei kanamonik, anan che ibegei anan chemulkwonyinik, anan chemogorgoinik, anan chorik, anan kipkeinik, anan kibogitnik, anan che chubisie, anan rebik, che nyoru bounatetab Jehovah" (1 Kor 6:9,10).

Toogunotin tengekwojikab biteetab borto. Alak eng' choto chu: "sokset, simdo, maget ne ya agobo tuguk che yaach, saetab kanamonik, bonisiet, bunyondisiek, suriosiek, ng'etkonda, nereknatosiek, toiyosiek, kabesiosiek, pcheutik, kong' ne ya, bogitosiek, keiyandisiek, ak alak che u choto: kasib ateeywok agobo chu, ko u ye kisib ateeywok, ale icheget che yaei tuguk che u chuto ko manyoru bounatetab Jehovah" (Gal 5:19-21). "Amat obogitye eng' maiyek, che ibu maget ne ya, ago ingonyiak Tamirmiriet" (Ep. 5:18).

Kuurei Jesu eng' yu age tugul ne amei meelda agobo tugukab sobondo. "Ngo amei chi meel, ko ingonyonja, ak koe" (Johana 7:37,38). "Ee chi age tugul ne amei meel, obwanji beek, koboto inendet ne matinyei feda; obwa anyun, oal ak oam; ee, obwa, oal divaik ak chego ama eng' feda anan eng' alyet" (Is 55:1). "Ago age tugul ne eei beek che agochini ko ma koamei meel agoi; ago egu beek che agochini kondab beek eng' inendet, che kutu agoi sobondab koigeny" (Johana 4:14).

4. CHEPKOIGOCHET. – Ng'alali chepkoigochet agobo chorinatet, nyalulnatet eng' kasetab it ak bonisiet. Ya ngelelnatet ko u bonisiet (1 Sa 15:23). "Barei chito ne choriren magennyi; Amu esioi eunekyik kobois. Mi ne kasei miat eng' keiyandit bet komugul" (Kal 21:25,26). Kilenji Joshua Israelik, "Amochorirene, oba ak ochut emet ak onam" (Kir 18:9). Choriren kot biteetab chi ak ma isib konamei tugukab Jehovah. Kole Jesu, "Ogiilge obun kurget ne mariich" (Luka 13:24). "Age tugul... ne cheng'ei, konyoru" (Mt 7:8). "Ruachin bik bounatetab kipsengwet, ak namei bik che koromen eng' kimnatet" (Mt 11:12).

Ye ma kimage kiy agobo yetunet ak mieindo ne tokyingei sobonwekyok koegu meet ne bo koigeny. Kirindaech ma kisa, ma kisiach tuguk che bo orit agobo Jehovah, ma kitaach magornatet ne bo kayomisutikab Jehovah; tokyinech ng'emisiet. Ye ng'alalun Jehovah rani, kogiilin igochi Inendet muguleldang'ung rani, kolenjinin oindet yai noto mutai, anan eng' betut age ye kemugak, ne eng' iman komuchi ma biit betunoto; ak ime ko metinye yetunet ak ko metinye Kristo. Mwaei Jehovah kole, "Ngot ogas kutinnyi rani ko mat ouuiit mugulelwekwok, ko u kaiimset, ko u eng' betutab yomset eng' ong'atet" (Heb 3:7,8). Tos ata bik che kigobek eng' tamirmiriet koesioi yetunet kobwati agobo betut age ne abere ma ek? Ma neng'ung'et betutab mutai.

Boisie kotugul bonik rokyetab chepkoigochet eng' bonisiet, ak koboru eng' yu tengektab kamang'unet ak yaetab bonisiet, mwaetab kelunaik, ng'orset anan ko kayanetab bonitwogik, ne kata kiyani Jehovah ne sobei. Kimwawech keguur Jehova ne sobei, mising' eng' ye mi tiemutik ak mianwogik, nyalilda ak arogenosiek, ne chobot kotoretech ne kata kimang'u keluno ne mie anan ko ne ya; amu "Chobei Jehovah ole bunoti chi" (T Kal 37:23). "Mitei ne miani eng'

kwenung'wong'? ingoguur boisiekab kaniset; ak kosa ichek agobo inendet, koiile mwaita eng' kaintab Kiptaiyat: ak kosoob saetab kayanet inendet ne miani, ak kong'eet Kiptaiyat inendet; ak ngot ko kigoyai tengekwojik, kenyochi kaat. Ong'ang'jige anyun kachililitikwok okwege, ak osachinige okwege si kobiit kisoobok" (Jakobo 5:14-16). King'at Jehovah lagokab Israel kolenji, "Amat kobiit eng' okwek ne igoitoi werinnyi anan cheptanyi kobun mat, anan ne boisie ng'orset, anan kipsogeiyot, anan ne isogisie, anan bonindet, anan ne abusisie, anan ne ng'alali ak oik, anan bonindet, anan ne ng'alali ak che kigobek. Amu wechei Jehovah chi age tugul ne yaei tuguchu" (Ne K. Ng'a 18:10-12). "Mi sang' sesenek, ak bonik ak che soksei, ak rumik, ak che saei kanamonik, ak age tugul ne chamei lembeita ak koyaei" (Ng'a 22:15). "Amobe oldab che boisie oik, anan bonik: amocheng'ate, si maing'wanitak: a Jehovah Kamuktaindeng'wong'" (A. La 19:31). "Ak ye mwawok kole, Ocheng'ate ichek che boisie oik ak bonik, che twegu ko u taritik ak che nyeanyei ng'alek; tos manyoljin bik kocheng' Kamuktaindenywa? Tos nyoljin kocheng'at che kigobek agobo che soptos? Onamge ak ng'atutik ak baornatet! Ngot ko mang'alal ichek kosub ng'olyondonito, ko amu mami lapkeiyet eng' ichek" (Is 8:19,20).

Ye isomani bukuini ming'in, kong'alalun Jehovah, koguurin imete tengekwojik ak igochi Inendet sobeng'ung', ago gonin kabwatutik che terjin tamirmirietab chepkoigochet, ne mitei muguleldang'ung' si metil ng'olyondonito, ak kotiemi konyiit muguleldang'ung' kaiyweisiet. Tos mwa nee bikab gonnyu, choronokyuk, ak bik alak ngot aegu Kristianindet ne bo iman? Tos yaak nee ngot ta awe ureriosiek, igorwek ak boiboiosiekab ng'ony kogeny? Ne kategeere magornatosiek che eechen eng' Kristo Jesu, kalyennyi ne bo kwong'et, boiboiyennyi ne ma mwaoksei, torornatennyi, sobondab koigeny ne nyiitat boiboiyet, itau igeer tuguk tugul che imuchi ibeet" ye ichamji Kristo konyo muguleldang'ung', ye yain kaiyweetab chi ak kaiyweetab meet ieggu otwogetab oindet. Ago kinyo Kristo si kotiach ichek che ki otwojik eng' sobenywa tugul amu kaiyweisietab meet. (Heb 2:14,15). Yain tamirmirietab nyalulnatet eng' kasetab it ieggu ngelelio kot kouuit muguleldang'ung' ko u rokyetab chepkoigochet.

5. CHEPLANGET. – Cheplanget ko tondo ne korom mising'. Kigoboi wechet, neregek ak nyitatet muguleldab chito ak kondochin kotugul koromis. Abere imuch itiem irib nereknatanoto ng'ung'et kot koit komong' eng' koromnatennyi tugul. Mie iyan ile mitei muguleldang'ung', ak isom Jesu kotiachin "Mete nereknatet, ak iistoege neregek che laldos: Ameiimege, amu ibu noto yaitiet" (T Kal 37:8). "Korom nereknatet, koromen mising' neregek" (Kal 27:4). "Amesartae neregek eng' sobondang'ung': amu tebe neregek tegetikab che berber" (Amd 7:9). "Olaakte... neregek" (Kol 3:8).

Eisei bik che chang'che nyogoren si konyigonitu ak koyai boisionik che yaach anan koyaakta mugetut, ago "Ng'wonetab maswetisiek divaikwak" (Ne K. Ng'at 32:33). Anyiny yaaktaetab mugetut eng' muguleldo ne bo tengek, ago Jehovah ne kerekong' yaitwojik tugul. Mwaei Jesu kole, "Cham chitab kokweng'ung' ko u ole ichamdoige" (Mariko 12:31). Ak "Ocham bunikwok" (Mt 5:44). Kigoyomis Jehovah konyoiywech kaat yaitwojik che kigeyai, ngot kenyochini kaat bik alak yaitwojik che kigoyaiywech (Mt 6:12). Wechei Jehovah tamirmitiet ne bo katuituet ak kang'unyng'ung'et. Mitei magetab tumdaetab kotorik ak ne bo luget muguleldab chi, noto anyun magat kalyet ne bo iman eng' muguleldo ngot ko magat kotebi agoi.

6. NDARET. – King'al ndaret Awa eng' mbaretab Eden ak kobut yamdaet ne kararan ak choruandit koboto Jehovah. Kiamji ng'etkong' Setani Adam ak Awa, ye kingogeer ichek kobou ng'ony komugul, komi ichek ak Jehovah eng' sobet ne bo yamdaet ne igesunotgei, ko kageibe kebebertanyi. Kichob Setani ng'emisienywa kobunu ng'etkonda, ak kiisuldae kobut choruandinywa ne bo kwong'et ak sobet koboto Jehovah. Nito kora ng'etkondab oindet ak ko ne ya ne mi muguleldab chi ne ng'emei boiboiyet eng' muguleldab bik alak ye keer ko boiboen ak

komeng'isiei eng' kalyet bik alage. Ipchin ng'etkonda kabwatutik che yaachen muguleldo si kong'em boiboiyetab bik alak, ak komuchi kora koib rumisiet. Nito ko kit ne tese tai mising' eng' sobetab bik che itunotingei. "Amu ng'etkonda nereknatetab chi; Ama rire eng' betutab yaaktaetab mugetut" (Kal 6:34). Konu ng'wanindo ak weget ne ma kimuchi kemwa eng' mung'aret ak eng' oldinwek alak tugul che bo boisionik. U noto metiagotin agichek Kristianik che kiboitinik amdoik ak mestowekab kaniset ye it koboisie Jehovah age eng' kiboitinikyik kosiir icheget. Kanyol koek ichek che ribegei, ak ko nyiitootin chamnyet ne tilil ne bo Jehovah ne kigorong'ji inendet mugulelwekyok eng' Tamirmiriet ne Tilil (Rom 5:5), ang' buch kong'emei biteetab ng'etkonda boisiet ne igesunotgei ne yachin Jehovah ak otisienywa.

7. MOROROCHET. – Ng'alali mororochet eng' yu agobo tengekwojikab keiyandit ak chametab siling'isiek ne tigitotab yaitwogik tugul (1 Tim 6:10). Mitei emetab Congo mororochik alage che amei kuutik che ing'oniatu bogolusiek kot kote kowirenso ak kobetogis kobek. Machamei chito ne kipkeiya koyat eunnyi si kotoret ne banani ak ne nyalili, ago tiemei eng' or age tugul ne mie ak ne ya konyor chang'indab magornatosiekab ng'onnyuni. Mwaei Jesu Inendet kole, "Amogonorjige konoraik eng' ng'onny, ole amei kiptorotini ak karuotitoet, ak ole butei chorik ak kochor; ago ogonorjige konoraik eng' kipsengwet, ole ma amei kiptorotini anan karuotitoet, ak ole mabutei choric ak kochor; amu ole mi konorueng'ung', komitei oloto muguleldang'ung' agine" (Mt. 6:19-21). Kigilage koik Akan ak gonny amu kicham inendet tahabu, feda ak ngoroik (Josua 7). Kiigetgei Judas Iskariot, ne ki bo alamalyetab Jesu, amu kiyai inendet chametab siling'isiek kong'wekta Kiptaiyandennyi. Ma siling'isiek icheget che yaachen, ama tahabu, ago chametab siling'isiek ne tebyei koung'at eng' muguleldab chi.

Ng'emei murenik ak kobogorisiek alak tugul ak che bo bororiosiek tugul, sobonwekwak ak che bo gorikwak eng' maget ne ya si konyor magornatosiek che chogu ye yaei ureriosiekab keljinet ne bo siling'isiek che chang' kot koboisie tióng'ik ko u mbartanyisiek, sesenik ak alak. Maget ne bo keek magorio ama eng' boisiet ne kibirtojingei kondochin bik agoi chorset ak rumisiet koboto kagetetab ge. Tinyei choronok che chang' chametab siling'isiek, che choto ko chametab toogunet, ne bo bounot, abere bounot ne bo keboi bik alak, bounot ne bo siling'isiek si kinyalil che bonon; bounot eng' bich che bo kayanet, kitoror mising' kainet ne bo kanisa age tugul kosiir ne bo Jehovah, ye ma kitaach lakwa ne bo Jehovah ne tinyei nyiganatet kosub Kristo ama kele kabunji kanisa ne naat (Mariko 9:38). Kole Jesu, "Ogeer, ak oripge eng' kasetab miat tugul: amu matebyei sobondab chi eng' chang'indab tuguk che tinyei (Luka 12:15). Kimwau atindiotab magoriot ko u ni: "Kimi magoriot age ne kiga rur mbarenyyi mising': ak kiibwat eng' muguleldanyi kole, Ayae nee, amu matinye ole agonore bekyuk? Ak kile, Ayae ko u ni: abute chogenikyuk, si ateech che eechen kosiir chu: si agonore bekyuk ak tugukyuk tugul che miach. Si alenji sobondanyu, sobondanyu, itinye tuguk che chang' che miachen che konorotin che yamaei kenysisiek che chang'; imuuny, amisie, eeise, ak ibaibaitu. Ago kilenji Jehovah, I berber inye, kimchei sobondang'ung' kemauni bo ra; ara, si kobunji ng'o anyun, tuguchoto koichob? U noto anyun chito ne konorjingei magornatet inengei, ne ma magorio eng' Jehovah" (Luka 12:16-21). "Amu nyoru borot nee chi, ngonyor ng'onny komugul, ak kobeet sobondanyu?" (Mariko 8:36). "Noto anyun amwawok ale, Amogerer met agobo sobeng'wong', eng' tuguk che oame; anan agobo borwekwok, eng' tuguk che olaachi... Ago ocheng' okwek bounatetab Jehovah, si keteswok tuguchuto tugul... Amu ole mi konorueng'ung', ko oloto ole mi muguleldang'ung' agine" (Luka 12:22-34).

8. SETANI. – Setani ko kwandab lembechek tugul ak ko bo ichek tugul che mwaei lembechek, inendet ko ne igoigoech keyai tengek, ak ko bounindetab muguleldo. Kole Jesu, "O bo kwandang'wong' Oindet, ak ochame oyai magutikab kwandang'wong'. Ki rumindet koboch

taunet, ama tononi eng' imanit, amu mami imanit eng' inendet. Ye mwaei lembech, komwaei agobo tugukyik: amu kiplembewha inendet, ak kwanda ne bo noto" (Johana 8:44). Kergeri lembeita kitigin ak ne o. Mitei lembechek che kemwaei, kesirei ak keyaei. Chombilindet ko kiplembewha amu eng' iman koboru boisiennyi eng' kenisiet. Ma mwaei lembech Jehovah ama yaei noto agine Kristianindo (Tito 1:2). Ngot kemwa kele kitinye yamdaet koboto inendet, ak kebendoti eng' mesundeito, kegenu, ama kiyae imanit" (1 Johana 1:6). "Mi sang' sesenik, ak bonik, ak che soksei, ak rumik, ak che saei kanamonik, ak age tugul ne chamei lembeita ak koyaei" (Ng'a 22:15). Wechei Jehovah, "Baoriat ne ma bo iman, ne mwaei lembech" (Kal 6:19).

9. **KECHEIYAT.** – Ng'alali kecheiyat agobo kabwatet eng' muguleldab chi tugul. Iboru eng' yuto kole muruon ak ko ya, abere kigome amu churjinet ne bo yaetab tengekto ne tese tai; korat ak ko nyiitat tengek, ne ma komuchi koruokyi boisionikyik. Kabwatonito bo yaitio ko ngab ko sisei, ak ngab koiimat. Igikyin eng' ye kata nyoe kaat ak nyoe kaat eng' ye kategikyin. Imuchi ko meat ko u yo kigebeele karnet ne lalei, ak kigobeet kabwato age tugul ne mie ak konyoru kaset kityo eng' metoetab kayanet, kogasei it tamirmirik che bo lembech ak kosubi konetisiosiekab oik, ak koepchin it konetisiosiek che mwaitaati kiplembewha (1 Tim 4:1,2; Heb 10:22).

10. **KONDA.** – Keerei kondab Jehovah kit age tugul ne yaaksei eng' muguleldo. Mami kiy ne imuchi koug'ak eng' kondanyi ne lalei ko u leldat, ak amu noto kongen ak kogeerei Inendet kabwatutik tugul che bo ung'ot ak chobutikab muguleldo. Keerei Jehovah kiy tugul ne iyae, agot nde yae eng' kemout ne imen mising' kosiir, eng' timdo ne uui, eng' keringet ne loo mising' anan ko oldo age tugul. (Iboru kora konyek che mitei pichainichu ole u togetab chi.).

11. **NG'ELYEBWEK CHE MENGECHEN CHE BO MAT.**–

Ng'elyebwek che mengeche che bo mat che kiimuut muguleldo koboru chamnyetab Jehovah ne yiemei muguleldo ne nyiitaat tengekto. Nga wechei Jehovah tengek kochamei Inendet chi ama baibai eng' meetab kiptengekyot, ago kanyolji koistoegai inendet tengektanyi si kosob (2 Pet 3:9). Kinyo Jesu si kosor kiptengeginik. Mitei boiboiyet ne o eng' kipsengwet amu kiptengekyot agenge ne sigu (Luka 15:7). Ng'alale kora ng'elyebwek che mengechen korotikab Jesu Kristo, "Aruet ne bo Jehovah, ne ibei tengektab ng'onny!" (Johana 1:29).


12. **MALAIKAIYAT.** – Malaikaiyat ko kaborunet ne bo Ng'olyotab Jehovah. Machei Jehovah kong'alalji ichek che kigeng'al ak kolaei milosiek che nyigisen che bo tengekto, si kobiit koweek ichek eng' ortinwekwak che bo tengek ak kochamji lapkeiyet ak chamnhyetab Jehovah kobwanji mugulelwekwak.

13. **CHEPTUGET.** – Cheptuget ko kaborunetab Tamirmiriet ne Tilil, Tamirmiriet ne ng'ang'u imanit agobo Jehovah, agobo tengek ak kit ne bo iman, koboto kiruogetab Jehovah (Johana 15:26). Kagibor Tamirmiriet ne Tilil eng' yu ko mitei sang'utab muguleldab chi. Magoi meny Inendet ole bounisie tengek.

Ngot kogergei pichaitab muguleli ak ole u muguldang'ung', irirji Kiptaiyat yaaty Inendet muguleldang'ung, ingoluuchi lapkeiyetab Ng'olyondennyi orinnyi. "Iyan Kiptaiyat Jesu, si kesoron"

(Boisionik 16:31). Chamei Jehovah, ee, kigoyomis Inendet kowal muguleldang'ung', si kogonin muguleldo ne leel ak kabwatet ne leel. (Ese 11:19). Kiboru nito eng' pichait ne bo aeng'.

2. MUGULELDO NE IYANI KOLE TINYEI TENGEK.



Pichaini koboru muguleldo ne sigu ak kotau kocheng'ei Jehovah. Namei malaikaiyat rotwetab chok, Ng'olyotab Jehovah, ne "Sobei... ak ko kim, ak ko ng'atib kosiir rotwetab chok ne ng'atiben komoswek tuwai, ak kotoorei agoi kobesio sobondo ak tamirmiriet, ak ole tuiyechin kowek ak amset, ak chepcheb koguiyo kabwatutik ak magutikab muguleldo" (Heb 4:12). Ibwatyin Ng'olyotab Jehovah inendet kole, "Melektab tengek ko meet" (Rom 6:23) ak eng' noto ko "Kiging'at agobo bik kobek konyil agenge, ak ye ibata nito koek kiruoget" (Heb 9:27). Kiptengekyot ak ne maiyani, "Kotinyei kebebertanywa eng' araraita ne lale mat ak koik che laldos" (Ng'a 21:8).

MUGULELDO NE IYANI KOLE TINYEI TENGEK

Namei malaikaiyat eng' eunnyi age tertab metit. Nito ko si kobwatyi kiptengekyot kole kibegu achek tugul. Bortanyo ne kichame mising' kot, ne kilaachi, kibae ak kelelesanjini, keribe ak kechamjinige si kobiit kisuldachi magutikyik, ko tun meei ak konun, ak kong'em kuutik ak kong'etu kosoptos koigeny sobondo ak tamirmiriennyi, ak tun toogu besio eng' taitab Kristo, si kobiit koruokyi Inendet (2 Kor 5:10).

Kigeere eng' yu kotau kiptengekyot koyani Ng'olyot ne bunu Jehovah ak koyatyin muguleldanyi chamnyetab Jehovah. Tau Tamirmiriet ne Tilil koluuchin muguleldo ne imen ak ko nyiitaat tengekto. Nyonjin muguleldanyi lapkeiyetab Jehovah si koonda mesundeito kolooit. Ngo nyo orit lapkeiyetab Jehovah, komandoi mesundeito ne matiny. Kanyol kwo tengekto ne kigiborune eng' yu tiog'ik che terjin. Noto anyun, ee somanindoni, chamji Jesu, ne Lapkeiyetab ng'ony, konyo muguleldang'ung' orit, si kobiit koistogei eng' muguleldo mesundeito ak yautik che yaachen ko u ye kiboru eng' pichaini. Kole Jesu, "A lapkeiyet ne bo ng'ony: inendet ne isuba ko mawendoti

eng' mesundeito, ago nyoru lapkeiyetab sobondo" (Johana 8:12). Magoi imuch iiste tengektgo komanda eng' muguleldang'ung', eng' kimanteng'ung' ng'omnateng'ung' anan ko eng' ng'omnatetab bik alak. Oret kityo ne nyamnyum, ne bo iman, ne bo chokyinet ak kosuldaat kosiir, ko kechamji Jesu, ne Lapkeiyet, konyo orit, si kobiit koistogei mesundeito, ne noto tengekto. Imuchi arawet ak kecheik kogonech toreto eng' kemout ne imen, ago ye kagochor asista, kobet mesundeito koboto lapkeiyosiek che mengechen. Jesu ko Asista ne bo imanda. Ye kingwo Inendet hekalut eng' Jerusalem, koon icheget tugul che kialisiei ak koaldoisiei eng' oloto. Kiigabui Inendet mesosiek che ki bo walikab siling'isiek ak mesosiek che mengechen che ki bo icheget che kialdoi cheptugenik, kolen, "Sirat kele, kiguure gonnyu gotab saet: ago kaowal koek kebenetab rebik" (Mt 21:13). Kanyol koek muguleldang'ung' gotab Jehovah, hekalutab Jehovah. Machei Inendet komeny orinnyi, koyai kotililit, konyiit lapkeiyet, chamnyet ak boiboiyet. Ma nyo Jesu kityo konyoiywech kaat tengekwoigikyok, ago kinyo Inendet si kosoruech ak kotiachech kemong'une kimnatet ak bounatetab tengek. "Ngotiachak anyun Werit, ko otiagotin iman" (Johana 8:36).

3. MUGULELDO NE SIGU



Iboruech pichaini agobo atebetab muguleldo ne bo chito ne sigu eng' iman. Keerei nguno oindo ak yaiietab tengekwoigikyik che chang' che kimechi Jesu eng' kimurtoiyot. Ye keerei inendet kimurtoiyot ne iborjin malaikaiyat, Ng'olyotab Jehovah, kogochin muguleldanyi ne arogeni koil, ak komuch kole mutyo inendet agobo tengekwoigikyik che chang'. Ye keerei inendet chamnyet ne o ne bo Jehovah ne kiborjin eng' Kristo Jesu, kochooti chamnyoni muguleldanyi, mising' ko ye tau konaiei kole kinyo Jesu Kristo, Weritab Jehovah si koib tengekwoigikyik che chang', ko u ye kicham inendet kome eng' kimurtoiyot ne kita inendet.

Nyuru naet komie eng' muiguleldanyi kiptengekyot ne sigu agobo kit ne kigibirji Jesu, kilaakyin metinnyi ngatietab katok, kebirjin kipchumarisiek eunekyik ak kelyekyik ak kome eng' kimurtoiyot agobo tengekwoigikyok, ye walei muguleldanyi ak sobondanyi inne. Tau kotesei konaiei mising' ole ki te looindanyi eng' Jehovah ak bistoennyi eng' ng'atutikyik, ye somani Ng'olyotab Jehovah

ne imuchi kogeerege ko u eng' kioit. Nyoru inendet ng'wanindo ak arogenet ne o mising', ak ye rong'jin muguleldanyi taitab Jehovah eng' beekab kong' ak rirek che ng'wonen, korikyin Jesu inendet. Bwanjin muguleldanyi chamnyet ak kalyetab Jehovah ye tau konaiei kole itililech "Korotikab Jesu Werinnyi eng' tengekwoigikyok tugul" (1 Johana 1:7). "Yaiywa muguleldo ne tilil,

ee Kamuktaindet; ak iyai tamirmiriennyu koleelit ak iyuokyi eng' orit" (Tiendab Kalosunet 51:10). Mwaei kogeny Ng'olyotab Jehovah kole, "Ageni inendet ne banan ak konyerategei eng' tamirmiriet, ne botani amu ng'olyondennyu" (Is 66:2). Yaei Tamirmiriet ne Tilil kotook komie eng' inendet ng'alecheb Jesu, "Weri (chebi), nyiganitu; kagenyoun kaat tengekwogiguk" (Mt 9:2). Tau konaei kole kageisto miletab tengek ye tese tai konyali kimurtoiyot ak korotikab Jesu che kigitumda eng' kimurtoiyot, koyani kole chuto tugul ko kiyaaq agobo inendet, amu kimuita Jesu eng' nyalilda ne kita nenyonet; amu "Kigitoor agobo bistaosiekyok, kigiguoten agobo tengekwogikyok," noto "kicham Jehovah koguoten inendet" (Isaia 53).

Namei Tamirmiriet ne Tilil ak chamnyetab Jehovah bounatetab muguleldo ne kagitilil. Naei inendet kole kagenyochi kaat tengekwogikyik ye iyani Jesu, ak eng' noto konyoru imanda eng' muguleldanyi kole, itilili korotikab Jesu, Weritab Jehovah, eng' tengekto tugul (1 Johana 1:7). Ingen nguno anyun inendet kole age tugul ne iyani Jesu ko mameei (eng' tamirmiriet), ago nyoru sobondab koigeny (Johana 3:16). "Kitinye eng' inendet katiagennyo eng' korotikyik, nyoetab kaat ne bo chalwogikyok" (Ep 1:7). Kagoistogei nguno magutikab tengekto che bo biteetab borto si kosich boroinde maget ne bo naetab orit mising' ne bo Jehovah ak keboisiechi Inendet "amu kisib kochamech inendet" (1 Johana 4:19). Chamei inendet Jehovah ak tuguk che bo Jehovah, ne kata chamei ng'ony ak tuguk che bo ng'ony.

Kigeere anyun nguno eng' pichaini kele tióng'ik che iboru agobo tengek komitei nguno sang'utab muguleldo, nga mamachei Setani kobagakta meng'atennyi ne ki bo tai, kusei kong' komang'u konyor ole chutune kogeny. Noto amu nee si koteeywech Kipgtaiyat Jesu keripse ak kesae; si kegirinde oindet si komweenech inendet (Jakobo 4:7).

4. KEBEGU KOBOTO KRISTO


Ng'alali pichaini agobo Kristianindet ne kigonyor kalyet ne igesunotgei ak yetunet ne bo koigeny eng' meetab Kiptaiyandennyo ak ko Yetindennyo Jesu Kristo, ak malosegei kiy age "Kobate eng' kimurtoiyot ne bo Kiptaiyandennyo Jesu Kristo, ne eng' noto ko kigigartat ng'ony agobo ane, ak ane agobo ng'ony" (Gal 6:14). Kime Jesu eng' kimurtoiyot "si kesopche eng' imanda" (1 Petero 2:24); noto Kristianindet ne kigome amu ng'ony. King'atech kele, "Obendoti eng' Tamirmiriet, si moyai magetab borto" (Gal 5:16,25).

Kiboru eng' pichainab muguleldo kit ne kigigartate Kiptaiyat Jesu ko kagoregune ichek ngoroikyik, koboto kipcharitisiek che kibire Inendet agobo tengekwogikyok amu "Kisoobench birutikyik" (Is 53:5). Kichot Herod ak askarikyik Inendet, ak kingobata kobire Inendet eng' kipcharitisiek, kolaakyi metinnyi ngatietab katok ne kita ilaakyin Inendet kutwetab tahabu, ak kiinde tegat eunnyi ne bo tai ne kita siaritab laitornatet, ak kigitung'so ichek eng' tainnyi kochotei, kolen, "Kigatin, Laitoriatab Yahudik!" Kising'ilji ichek Inendet ak kokwer metinnyi. Ye kingo kagochot Inendet kotewer eng' koromnatet, komut Inendet si kobiit kogartat (Mt 27:27-31).

Mitei bik che chang' che kelen Kristianik che saei, amei Mesetab Kiptaiyat, tieni tienwogikab Jehovah ago, eng' boisionikwak che bo tengek, kogartati Weritab Jehovah kogeny (Heb 6:6). "Maitei age tugul bounatetab kipsengwet ne lenjina, Kiptaiyandani, Kiptaiyandani; ago inendet ne yaei magetab Baba ne mi kipsengwet" (Mt 7:21-27).

Kigeere eng' pichaini kora loletab siling'isiek ne ki bo Judas, ne king'wekta Kiptaiyat Jesu ak koaldae Inendet fedaisiek sosom, amu kiga koboi muguleldanyi chametab siling'isiek ak noto kityo ne kiibwati. Tait, mugurek ak alak, ko tuguk che kiboisie askarik ye kingonamei Jesu

5. HEKALUTAB JEHOVAH



Iboru pichaini muguleldo ne tilil ak kounot ne bo kiptengekyot ne kigesor eng' chang'indab mieindo ak rirenetab Jehovah. Kigoek hekalutab iman ne bo Jehovah Kwanda, Werit ak Tamirmiriet ne Tilil, ko u eng' kayomisetab Kiptaiyat Jesu Kristo. "Ngo chama chi, korib ng'olyondennyu: ak kocham Baba inendet, ak kebwanji inendet, ak kemeny koboto inendet" (Johana 14:23). Igochin Jehovah chi teegisto, iberuri ak kolandoi eng' Jesu Kristo. (Luka 1:52).

Kagoek nguno muguleldo hekalutab iman ne bo Jehovah. Kageisto tengek eng' orinnyi. Ne kata tióng'ik che terjin che bou Setani, kwandab lembechek, kegeere Tamirmiriet ne Tilil, Tamirmiriet ne bo Imanit, komeng'isieie eng' muguleldo. Ne kata ta koegu ole bitune tengek, ko kagoek muguleldo ole kararan, ketit anan ko mbaret ne iyiei lagoek, ne iyiei logoekab Tamirmiriet, choto ko chamnyet, boiboiyet, kalyet, muitaet, talasiet, mieindo, atepto ne kiyani, kaming'inetab ge, ribetab ge ak alak che taagatin ak koboiboi Jehovah ak chi (Gal 5:22-23).

Kagoek nguno inendet temet ne iyiei logoek ne bo ketitab sabibuk, noto Kiptaiyandennyo Jesu Kristo. Ung'otiet ne bo temonito iyiei logoek ko amu ng'etu komenyei Kristo, ak komenyei Kristo ak Ng'olyondennyi inendet (Johana 15:1-10). Tinyei kamuget koterter biteetab borto ak magutikyik ak kobar ko u ye kiginyiit ak kibatisan eng' Tamirmiriet ne Tilil (Gal 5:24). Indochin Tamirmiriet ne Tilil sobondanyi, amagasei it magutik che bo biteetab borto (Gal 5:16). Ma kosobei inendet eng' che keerei, che kasei itik ak korotik, ago eng' kayanet-amu "ni ko katerteret ne iterteri ng'ony, noto kayanennyo" (1 Johana 5:4). Sobei eng' kayanet ak kamang'unet ak kogimit inendet kagenisiet ne bo nyonunetab Kiptaiyandennyo Jesu Kristo ne rigunat. Sobei kotesaksei eng' naet ne bo chamnyetab Jehovah, ne tebyei koigeny.

"Boiboen che tililen mugulelwek: amu tun keerei Jehovah" (Mt 5:8). Nga kitinyei Daudi magornatosiekyik ak katerterisiosiekyik eng' bunikyik, ko kiingen kole luget ne o ko kitese tai eng' muguleldanyi ak kotau konaei magetab orit mising ne bo tamirmiriet, kosa kole, "Yaiwo muguleldo ne tilil, ee Kamuktaindet; Ak iyai tamirmiriennyu koleelit ak iyuokyi eng' orit" (Tiendab Kalasunet 51:10). Mami chi ne imuchi kotilil muguleldanyi, anan koyai tamirmiriennyi koleelit kobate kityo eng' sigunet ye nyonji Jehovah inendet ko u ye kiyai Daudi, kosomei Jehovah koyai muguleldo ne tilil eng' orinnyi. Machei Jehovah koyai kiy ne leel eng'sobondang'ung'.

Nginab ole kererat eng' ngoroiguk che kererotin ye iboru mieindang'ung' eng' kayomisutik che bo lembech ak ripsosiek ko magoi yai muguleldang'ung' konyol koek meng'otetab Jehovah. Chobot kityo Inendet kotoretin, amu kigoyomis kole, "Abisenok beek che tililen, si otillitu: ak aundawok simdang'wong' tugul, ak kanamonikwok tugul. Agonok kogeny muguleldo ne leel, ak andeok tamirmiriet ne leel: ak aiste muguleldo ne u koita eng' borwekwok, ak agonok muguleldo ne bo banyek. Ak andeak Tamirmiriennyu, ak agonok obendate ng'atutikyuk, ak orib kiruogutikyuk ak oyai" (Ese 36:25-27). Nito ko Ng'olyotab Arurutiet ne Leel ne kigogonech Jehovah eng' Werinnyi, Jesu Kristo.

Kigeere eng' pichaini kotoogu malaikaiyat kogeny. Kigilewen malaikaisiek si kobiit komeny "Komoswek tugul che bo icheget che iywei Jehovah, ak kosoru ichek" (Tiendab Kalosunet 34:7; 91:11; Dan 6:22; Mt 2:13; 13:39; 18:10; Boisionik 5:19; 12:7-10).

Kigeere oindet kora eng' pichainito kotonone ye negite muguleldo ko u ne igeni boroin ne biitu si kochut meng'atennyi ne ki bo tai. Amu nito anyun kiteiywech ko u ni kele, "Oripge, oripse: amu wendoti bunyondeng'wong' oindet, ko u ng'etundo ne boriseni, kocheng'ei ne amei" (1 Petero 5:8). Walegei inendet atgai kora koigeitu malaikaiyatab lapkeiyet, koyomei lagokab Jehovah che ma ribegei koboisie magutikab ng'onyuni, kotiamei eng' ng'alsennyi koberber agot che lewenotin che bo Jehovah. Ago ngegirinde oindet, komweenech inendt (Jakobo 4:7).


6. MUGULELDO NE TINYEI YOMSET AK KO PCHEAT

Nito ko pichaitab arogenet ne bo kayanindet ne kagotuitui. Tau kogeraksei konda agenge, ne iboru kole tau kogaititu inendet ak konam ruondo eng' sobennyi ne bo Kristoinatet, ye keerto konda age kocheng'sei koyai chametab ng'ony. Kogotoi komeat lapkeiyet eng' orinnyi, ak pichainik che koiboru kele kochobot konyalil inendet koboto Kristo, ko kogolulyo ama ko tononiotin. Yiemei inendet yomsosiek che tau kogochingei komutyo ne kata kirindoi. Tau nguno kogasei ng'alsosiekab oindet ak kayomisutikyik che bo lembech, ne kata epchin it twegunetab Jehovah. Kigogaititit chamnyennyi agobo Jehovah eng' muguleldanyi, nga abere ta kowendi kanisa, kounyei magutikyik agobo tugukab ng'onyuni eng' kasubetab bitonwekab kayanet. Kagotoi kopcheak eng' kabwatennyi kotonone besiob orin aeng'. Tau kourerene tugukab ng'ony ak kochamei Jehovah eng' kenisiet. Tau komeati kecheiyat eng' muguleldanyi ak naetab kabwatennyi. Ma koibei kimurtoiyot eng' boiboiyet, ago egu ne ma ko taagat, millet ne nyigis. Tau kayanennyi kotumdumaksei, ak kotonon ma kobwati ama komage kiy ole u muguleldanyi ak kotoi komutyo kochopchi boroindo oindet ne igenisiei eng' sang'utab muguleldanyi. Boiboichin choruanditab bikab tengek kosiir choruanditab lagokab Jehovah che bo iman.

Tarit ne u merewet, ne kaborunetab losetab ge, kotau kocheng'ei oret kwo orit kogeny. Imuchi ko kigoutie kole kiga kisor eng' mieindo kityo, ak kotoi koek Kristianin ne losegei. Igongonyi kurget magetab eeisetab maiyek ak komachei konyo orit. Imuchi koek ye mitei ui, koboto choronok che bikab tengek, ole ililani kobangei, koek ne ma nyigan, amaingen konamgei ak bik, ne eng' yoto kolenji inendet ma ng'emun sobetab tamirmiriet betunito agenge. Yaegei komagak kabwatutik ak magutik che ma tokyingei Jehovah. Abere tau koboibochin ng'alek che bo muruonindo, kosakyin

ak kosakyin kogeerei pichaisiek che yaachen koboiboegai, ak koboiboichin choronok che ma nyolu, kowendi ole kiyae ureriosiek che yaachen, igorwekab ng'ony che yaachen, kondoi muguleldanyi kabwatutikab tengek che bunu oindet ne mwachin inendet kolenjin, ni ko biteetab borto, ak tengek agenge kityo ko ma ya.

Iman, ma kimuchi keyai kiy ye tarirendos kosiirei metowekyok taritikab timin che bo yaitiet ak kabwatutik che yaachen, ago ki ratotin ngot kechamji koboiywech ichek ak koteech kesonokwak



eng' mugulelwekyok, si koiyo boisionikwak che yaachen. Ngot kigochi oindet mornenno ne ming'in, kongen komie kole rebei eut tugul, komuti sobondo ak tamirmiriet agoi kotorji oldab mat. Noto anyun, iteywech Jehovah eng' kimnatet kole, kemwee magutik che bo neranik ak amat keurerene tengek, agot nda bun oret age tugul. Labat ole mi Jesu, ne Inendet ko ribindet ak ko toretindennyo.

Ng'alali chito ne toogu eng' pichaini kotoorei muguleldo eng' tigongi ot agobo icheget che chotei ak kogirindoi Kristoinatet. Toorei ak koguoteni ichek mugulelwekab Kristianik eng' kususwekwak che mwaei lembech ak ko chotisie: toorsosiek che magoi imuch kochilile muguleldo ne pcheat. Tau inendet koiywei bik kosiir Jehovah ak amu kaiweisiet agobo tuguk che mwaei ak koyaei chi, koegu inendet otwogetab bik, ak koistoegei Jehovah. Iborugei neregek ye mi kaiimutik ak kobwanji inendet eng'; kimnatet. Tau kochutu orit eng' oret ne manaaksei ndaranata ya bo ng'etkong', ne noto toogu ye kabor bik alage, ak ngot

kechamji boroindo kitigin, koyatyin kurget weget ak lasgeita.

Nyamnyum mising' kosopchi mugulelwekyok chametab siling'isiek kobate kegas it kateuneoikab Kiptaiyandennyo Jesu ye mwaei Inendet kole, "Oripse ak osae, si mochut yomset" (Mt 26:41). "Noto anyun ingoripgei si maibut, inendet ne ibwati kole tononi" (1 Kor 10:12). Kanyoljeh kilaach karikab luget komugul che konech Jehovah, si kobiit kimuch ketononse ak kegirinde kaberberisiosiekab oindet (Ep 6:11-18).

7. MUGULELDO NE KIGOWEKTAGEI LET ANAN KO NGELELIO



Pichaini ko ng'anyei ole u muguleldab chito ne kigoweigei let, ne kingo kagigochi lapkeiyetab Jehovah ak kochemjam konunet ne bo kipsengwet, ak koek yamdoidetab Tamirmiriet ne Tilil, kometo kayanennyi (Heb 6:4). Iboru kora ole u chito ne tom kosik anan kogochi sobondanyi Jehovah, angot nganda Logoiywek che kiguure "Logoiywek che Miach" ko kigeng'ang'ji inendet. Chito ne ingeleli ye ng'alaljin Jehovah, koyaitu kosiir nganda tiemei eng' kamugennyi ne matilei kiy kowal sobennyi.

Kiibor Jesu inendet ole u che kigoweigei let ye kingomwa kole "Ye kagomanda tamirmiriet ne muruon eng' chito, kosiir ole mami beek, kocheng'oti ole imuung'e; ak ye mata konyor, komwa anyun kole, kaweeektege gonnyu ole kiabunu. Ak ye it, konyor kobugot ak ko chobot. Kwo anyun, komut tamirmirik tisab alak che yaachen kosiir inendet; kochut anyun orit ak komeny oloto: ak yaitu kagesunetab chichoto kosiir ne bo tai" (Luka 11:24-26). "Kigoyaak eng' icheget ko u ye mwaei kalewenetab iman, kole, Weekyingei seset kang'undaikyik, ak kwo komildaagei ng'atatek kogeny toret ne kaga kiun" (2 Pet 2:22).

Mwaei kotook komie Sirutichu ole u che kigoweigei let anan ko muguleldab kiptengekyot ne ma sigu. Tengekto eng' ng'alsenyi tugul ko kigonyo kogeny kotebi ak koboi muguleldo. Agot togenyi koboru, eng' or age, ole u muguleldo. Tamirmiriet ne Tilil, cheptugono tala, kisimjin komanda eng' muguleldo, ko u ye memuchi tengek komeng'is ak Tamirmiriet ne Tilil. Ma imugakse koek muguleldo hekalutab Jehovah ak ole ung'egei Setani. Mandoi eng' aroget malaikaiyat, Ng'olyotab Jehovah, kogeerei let komang'u kole itei kosik inendet ko u werit ne kibetot ne "Kimachei mising' kole kobiyo metetek che kiamei torok: amu ma igochi chi kiy. Ak kingobwat, komwa kole, Tia otwogik che bo baba che tinyei amitwogik che yamei kot kosiir, ago ane, ko kabara rubo eng' yu! Ang'eete ak awe oldab baba, alenji. Baba, kiachalwogenji kipsengwet ak kiachalwogen eng' taing'ung': ma ko nyoljina kota keguurena wering'ung'" (Luka 15:16-20). Kigeer inendet kwandanyi ak korire, konyochi kaat ak kotaach eng' kagasetab ge.

Meboru muguleldo eng' pichaini signet ne bo iman, maweekyingei Jehovah, macheng'ei nyoetab kaat eng' kelyekab Jesu. U kabwatennyi ne ki gebeele karnet ne lalei ak keyai kosis. Tinyei itik ama kasei kuurset ne bo tuugetab Jesu. Tinyei konyek ama keerei keringet ne maigoksei ne bo Gehenna ne yatat eng' kelyekyik. Ma kolilani ye tesetai eng' tengekwoikyik. Kigonyo Setani kobounis eng' muguleldanyi ak kotebyei ng'ony ko u laitoriat eng' ng'echerennyi

ne bo laitornatet. Imugaksei kota kochaugei kole tilil eng' sang' ak ko konyitot, amu toogu kotinyei kayanet, ko u kererit ne kigisal koleelit ne kararan iman barak eng' keeret, ago nyiitat orit kowek che bo bik che kigobek, ak muruonindo tugul (Mt 23:27).

Tebe kwandab lembechek oldab Tamirmirietab imanit. Bendi tiony age tugul, tengek age tugul kibagenge koboto oin ak tamirmiriet ne muruon si kotebe muguleldanyi. Nganda machei kotiaigei eng' tamirmirichuto bo kanyalilet, kotesetai koratei inendet. "Meei chito ne kasas Ng'atutietab Musa ko mami rirenet, eng' baorinik aeng' anan ko somok: Obwatitoi ano okwek, ng'wanitu ne tia biret ne tun nyoljin kiruokyine inendet ne kigotiech Weritab Jehovah, ak koiit korotikab kayomiset, che kigitilile inendet, koek tuguk che ma tililen, ak kosas Tamirmirietab mieindo?" (Heb 10:28,29; 2 Petero 2:1-14).

Choruani, ngot konamegei pichaini ak ole u muguleldang'ung', irirji Jehovah eng' muguleldang'ung' orit amat igage. "Eng' noto anyun komuchi kogeny kosor agoi kasuldaet ichek che bwanjin Jehovah eng' inendet" (Heb 7:25), ak komuchi kora, ak kochamei konyoun kaat tengekwogik tugul, ngot inyonji eng' sigunet ne bo iman. Imuchi kogirinda Setani ak oikyik tugul, ak komanda ichek eng' muguleldang'ung', ngot ichamji kityo Inendet koyai ko u noto. Nyonji ko u chichoto kitinyei mogondosik, ne kinyonji Jesu ak kolenji, "Ngicham, imuchi itilila." Ak kirirge Inendet, ak kiiyogoito eunnyi, kotwa inendet, ak kolenji, 'kaacham; tililitu" (Mariko 1:40,41). Ago ngot itestai ingelel, ak icham mesundeito ne kata lapkeiyet, ko mami kamang'unet, mami toretet, amu kelewen meet ne kata sobondo – "Melektab tengek ko meet" (Rom 6:23).

8. KIRUOGETAB KIPTENGEKYOT

Kigeere eng' yu kiptengekyot ne ngelelio ne keuto tilennyi kosub Jesu, koriikyin meet, abere nyiitat bortanyi ng'wanindo ak ko nyiitat sobondonyi kayweisietab meet. Kagonyo meet (keek kawek) eng' betut ne ma kibwati ak ko ma magat. Kagoistogei boiboiyetab lembech ne bo tengekto, ak kago took imanit ne ibu kaiyweisiet ak kamuiset ne siirtoot. Kagoek iman nyalildab Gehenna eng' inendet. Nganda machei nguno kole kosa, komemuchi kong'alal ak Jehovah ne kigaesio chamyennyi koek keny.

Iywei choronokyik kotonone ye negite inendet, ama komuchi kogaiai inendet nguno ng'alekwak che bo buch. Amemuchi magornatennyi kotes sobennyi, anan kosor sobondanyi, anan kochuchuch nyalildab sobondanyi. Maimuchi kogas Jehovah amu maigochin boroinde oindet koyai ko u noto.

Kit age tugul ne kichamei ak kocheng'ei, kotoogu ko u yo churei inendet, agot ne maimuchi kotiegei, maimuchi kotoret inendet nguno kiboitiot ne ma sigunot, tisiindet anan ko kandoindetab kaniset, amu kigaesio chamyetab Jehovah ak kagoityi inendet kiruogennyi. Tau konaie kole "Kit ne bichii kot kibutyi eunekab Jehovah ne sobei" (Heb 10:31). Kiimang'u kogochi Jehovah sobennyi ye kigeerei kole mie eng' inendet, anan ko eng' itogunnyi ne bo meet, ago nguno koma komugaksei. Begu elfusiekab bik eng' chokyinet, ama nyor boroinde kobwanji Jehovah eng' itogusiekwak che bo meet. Noto anyun magat kebwanji Jehovah kota ko negit Inendet. Ne kata kasei Ng'alekab Jehovah che bo kagaigaet ak sorunet, kogasei kiptengekyondoni kiesio nyoetab kaat ak chamyetab Jehovah kota kosobei ye meati nguno, tuugetab Kiruogindennyi, Sorunindet ne kigaesio kolen "Oba eng' ole




ami, okwek che o chubotin, oba mat ne bo koigeny ne kigechopchi oindet ak malaikaisiekyik” (Mat 25:41). “Kiging’at agobo bik kobek konhyil avenge, ak ye ibata nito koek kiruoget” (Heb 9:27).

PICHAIT NE BO SOGOL

9. MUGULELDO NE ITERTERISIEI

Pichaini koboru Kristianindet ne kang’et ko ne kiyani ak koterteri tiemutik che ng’wonen ak yomsosiek. Ye kiyom eng’ kebeberwek tugul, kong’etu kotononot ak konamei noto agoi let, ko katerterindet eng’ Jesu Kristo. Ma chut labatetab Kristianik kityo, ago tese tai eng’ labatet, kolabati eng’ bekyinet, Kogeerei “Jesu, ne kandoindet ak ko kawong’unindet ne bo kayanet” (Heb 12:1,2).

Imuuti Setani ak oikyik tugul muguleldo ne iyani, kotiemei amai suldae komaas lakwetab Jehovah. Iborunotgei kora menotet, chametab siling’isiek, soksosiek ak alak. Eng’ komostab cheplanget kegeere nguno sigiriet, amu kotugul konyonjinech tengek eng’ oret ne ter, ak kounygei eng’ itonwek che ter anan ko kainet. Ago Kristianindet ne keertoi komie konaei kole tengek agot ngonyo eng’ itondab kayanet, anan ko koigei malaikaiyatab lapkeiyet, amu indochin Ng’olyotab Jehovah ak Tamirmiriet ne Tilil agoi imanit. Ureneri komuuti Kristianindet chito ne namei glasitab divaik eng’ eut age, ak kotiemei koyom inendet eng’ boiboiosiekab lembech che bo ng’ony. Maimuchi koita kiy Kristianindet ne kigogoitogei amu kigigartat koboto Kristo amu



tengek ak magutikab ng'onnyuni. Chito ne bo aeng' eng' pichait, kotoore Kristianindet tigongiot. Toorel kotugul muguleldab kayanindet ne bo iman tagisiet, chaamset, churisiet ak kamuiset ne bunu bik che maiyanotin mising' ko che kiguure eng' lembech kayanik. Ago ma kasei inendet tuguk che mwaei bik ago ribei kityo tuguk che mwaei Jehova. Ibwati ng'alekab Jesu "Oboiboi ye churok bik, ak ye usausok, ak ye mwaitaenak yaitiet age tugul kong'ochok agobo ane. Oboiboitu, ak ogasge mising': amu o meлектang'wong' eng' kipsengwet" (Mt 5:11,12).

Tiemei kotugul borto ak oindet, kobesio Kristianindet eng' chamnyetab Jehovah. Ago eng' boiboiyet ne o ak nyiganatet komuchi komwa iman kole, "Ibestosech ng'o eng' chamnyetab Kristo? nyalilda, anan bichiindo, anan usisiet anan rubetanan ach ngor anan ng'oiyondit anan rotwetab chok?" (Rom 8:35). "Ago, ki katerterik kot kosiir eng' tuguchu tugul eng' inendet ne kichamech" (Rom 8:37). Ye kagolaach karikab luget komugul che bo Jehovah, komuch kogirinda kaberberisiosiekab oindet, ye kait betut

ne ya, ak ye ka goyai luget agoi let, kotinyei tononet eng' Jesu Kristo, ne kiiterter eng' tiemutik ak yomsosiek tugul, ak eng' Inendet keegu katerterik ak ketaach kutwet ne bo torornatet ne ma ng'emaksei (Ep 6:10-18; 1 Pet 5:4).

KECHEIYAT ne bo kabwatennyi kotoogu ak kolu. Nyiitat kayanet muguleldanyi, ak nyiietab Tamirmiriet ne Tilil. Malaikaiyat, ne Ng'olyotab Jehovah, kobwatyin inendet magornatetab kaberoiok che kigochin icheget che iterterisiei ak ko tononiotin agoi let. "Inendet ne iterteri, agochini koam che bo ketitab sobondo ne mi Paradis ne bo Jehovah." "Inendet ne iterteri ko manyoru ng'wanindo eng' meet ne bo aeng'." "Inendet ne iterteri, agochini che bo mana che ung'otin, ak agochi koita ne leel, ak kigisirji koyata kainet ne leel "Ak inendet ne iterteri, ak koribei boisionikyuk agoi kagesunet, kotun agochini kimnatet koboi bororiosiek." "Inendet ne iterteri kotun kilaakyin ko u noto ngoroik che leelach; ak magoi abuch kainennyi eng' bukuitab sobondo, ago ang'anye kainennyi eng' taitab Baba, ak eng' taitab malaikaisiek." "Inendet ne itert teri, ayae koek toloita eng' hekalut ne bo Jehovah nenyu, ama komandoi sang' kogeny." "Inendet ne iterteri, kotun agochini kotebi koboto eng' ng'echerennyu ne bo laitornatet, ko u ye kiaterter agane, ak ketebi ak Baba eng' ng'echennyi ne bo laitornatet" (Ng'a 2:7,11,17,26; 3:5,12,21).

LOLETAB SILING'ISIEK NE YATAT koboru kole ma mug-uleldanyi inegei ne kigochin Jehovah, ago boto siling'isiekyik agichek. Ne kata iseri siling'isiekyik, kotorete che bonon, kogoitoi kebebertunyi ne bo taman (kebebertab taman ne bo tuguk che nyoru) ak kogochin Jehovah kogochinoik anan ko tugul che tinyei, koboisie kiy tugul kotorore Jehovah.

MAKATIAT AK NJIRIOT koboru kole sobei eng' tililindo ak ribetab ge. Mang'emei sobennyi eng' eisetab maiyek anan koam amitwogik che muruonen (Boisionik 15:20). Ma iseeri siling'isiekyik, ana kong'em bortanyi (ne hekalutab Jehovah), eng' mumulet anan ko kuuletab tomotet, ama boisie kerichekab bogitet anan ko kerichek che ng'emisie, ago amei amitwogik tugul che tililen che teksei. Kigoek muguleldanyi gotab saet. Wendi kora tuiyosiekab kaniset kotugul ak eng' konyit, eng' ui tugul ak eng' boroinde age tugul. Chamei saet, ngo eng' kanisa anan ko ak bikab gonnyori, anan ko eng' gonnyori, amu ingen kole manerei eng' kaynet Kristianindet ngo koma ng'alaljindos ak Jehovah eng' saet.

BUKUIT NE YATAT koboru kole yatat Bukuit ne Tilil eng' inendet, ak somani ak konetegei kotugul, kocheng'ei ng'omnatet ak kimnatet, sobondo ak lapkeiyet, ak magornatosiek che maiitoksei eng' orinnyi. Kigoek tait ne indochin inendet ak rotwetab chok ne iterere oindet. Amitwogik che bo sobondonyi betut age tugul, beek che tisei meleldanyi, oldo ole iunegei inendet, ak ko kiooit ne keeregei inendet.

Chamei kosut kimurtoiyondennyi, amu ingen kole mami melektu ngo ma kimurtoiyot. Ko u ye ingen kole kiging'et koboto Kristo si kobiit kosob sobet ne leel, kondoi muguleldanyi tuguk ched mi kipsengwet, kobwati tuguk che mi oloto, ma tuguk che mitei ng'onyuni (Kol 3:1-2). Chobot inendet kotuiyo ak Jehovah, ak kogergei ak ketit ne kigiminji ole negite ainosiek; ne iyiei logoekyik eng' betusiekyik (T. Kal 1:3); u temet ne bo ketitab sabibuk ne bo iman, ne iyiei logoek che chang'. Maingen inendet kaiyweisietab meet, amu kigonyi inendet chamnyetab Jehovah ne igesunotgei, ne kitaah eng' Tamirmiriet ne Tilil.

PICHAIT NE BO TAMAN

10. BANDAB GA NE BO TORORNATET

Kole Jesu, "A ng'eetyet, ak sobondo: inendet ne iyana, agot ngo me, ko ta kosobei: ak chi aghe tugul ne sobei ak koyana ko mameei matiny" (Johana 11:25,26). "Inendet ne kasei ng'olyondennyu, ak koyani inendet ne kiyokwa, kotinyei sobondab koigeny, ama wendi ole mi kiruoget, ago kagomong' eng' meet komong'ji sobondo" (Johana 5:24). Matinyei meet kaiyweisiet anan ko kiruoget eng' Kristianindet. "Kagelugui meet eng' kabelisiet Ee, meet, mi ano kabelisieng'ung'? Ee, meet, mi ano ng'wanindang'ung'?... Kigochini Jehovah kongoi, ne konech kabelisiet eng' Kiptaiyandennyu Jesu Kristo!" (1 Kor 15:54-57).

Chito ne kigosob ak kobendat ak Jehovah ko maiywei meet. Ye it betutab meennyi, kowendi eng' boiboiyet, ko ye mwaei Paulo ne kiyoktoi kole, "Atinye maget awa ketebi ak Kristo; amu mie noto mising' kosiir" (Pili 1:23).

Tinyei maget Kristianindet kogeer togetab Jesu, ne kimechi inendet ak koyaakta besendo ne bo tengektanyi eng' kimurtoiyot. Ibwatyin Tamirmiriet ne Tilil kogeny ng'alekab Jesu, "Amogochi mugulelwekwok koiimgei: oyani Jehovah, oyana agane. Mitei gorik che chang' eng' gotab Baba... anyone kogeny amutok; si ole ami omite ak okwek" (Johana 14:1-4). "Tuguk che kima keer konda, ama kas itit, ak ne kima chut muguleldab chi, Tuguk alak tugul che kichopchi Jehovah icheget che chamei inendet" (1 Kor 2:9). Mamitei kutit eng' ng'ony ne imuchi chi komwaune anan koborune kororonindab nganasetab kisengwet ne kigechopchii ichek che isubi tiegutikab Kiptaiyat Jesu Kristo eng' ng'ony.



Ne kata chito ne bo kamuiset ne kagoek kowek (meet), kegeerei malaikaiyat anan ko ne kiyoktoi ne bo Jehovah eng' pichaini bo let. Igeni komutyi Jehovah tamirmiriet ne iunot. Kitiachi sobondo ak tamirmiriet eng' ratisietab borto, ak kwo barak kobun kurgotik che yatotin che bo kipsengwet agoi ole mi Jesu ne chamei inendet ago kimechi eng' kimurtoiyot. Igeni inendet taakset ne bo boiboiyet eng' taitab Jehovah ole igati Kiptaiyandennyi eng' ng'alechu bo kalosunet "Kiyai ne mie, otwogindoni mie ak ne kiyani... mong'ji anyun boiboiyetab Kiptaiyandeng'ung' " (Mt 25:21). Ma ko bou Setani inendet kogeny amu "Kime kibananiandanato betut age, komut inendet malaikaisiek konde tegetab Abraham" (Luka 16:22). "Ak kiagas kutit kobunu kipsengwet, kole, Sir ile, Boiboen ichek che begu eng' Kiptaiyat koboch nguno: ee, mwaei Tamirmiriet, kole si kobiit komuuny eng' boisionikwak, amu isubi ichek boisionikwak" (Ng'a 14:13).

NG'ALEK CHE BO LET

Somanindoni, ngotoretin Jehovah si igochi muguleldang'ung' inendet ne chamin, amu ng'alalun inendet nguno kolen, "Weekchigei eng' muguleldang'ung' tugul" (Ne K Ng'a 30:2). Igochi Jesu muguleldang'ung' ne ng'etat, arogenot, ne mami si kogonin muguleldo ne leel ak kabwatet ne leel. Amat igany kong'alun muguleldang'ung' ne iberberisiei anan isub magutikyik, amu "Mong'une orit, eng' muguleldab chi, kabwatutik che yaach..." (Mariko 7:21). Bagakte tengekwogiguk ak inam noto mie "amu melektab tengek ko meet ago konunetab chamnyet ne ko Jehovah ko sobondab koigeny eng' Kristo Jesu Kiptaiyandennyo" (Rom 6:23).

Ak eng' inye ne kiigochi sobondong'ung' Jehovah, "Nam itondab ng'alek che bo iman che kiigasena,, eng' kayanet ak chamnyet ne mitei eng' Kristo Jesu" (2 Tim 1:13). Agobo noto ko kisir Paulo eng' 2 Tim 1:12, "Angen inendet ne kiayan, ak ayani komie ale imuchi korib not ne kiogochi inendet agoi betunoto". Teeigei inyege eng' kayaneng'ung' eng' Jehovah, sa eng' kamugetab Tamirmiriet ne Tilil, ripge inyege eng' chamnyetab Jehovah, igeere Jesu, ne oret, iman ak sobondo, Kiptaiyandennyo ne weeksei konegit nyo komutyingei lagokyik "Laitoriat ne bo laitorinik, ak Kiptaiyat ne bo kiptainik" (1 Tim 6:15).

“Ingobunji anyun nguno Inendet ne imuchi koribok si mobutye, ak kondeak taitab torornatennyi eng’ boiboiyet ne o ko matinye tisia, kobunji Jehovah ne inegei, ne Yetindennyo, eng’ Jesu Kristo Kiptaiyandennyo, torornatet, etunatet, bounatet ak kimnatet, koboch keny, ak nguno, ak agoi koigeny.

Amen” (Juda 24,25).

A SPECIAL WORD FROM ANGP
UN MONDE SPÉCIAL DE L'ANGP
UMA PALAVRA ESPECIAL DA ANGP

This booklet "The Heart of Man" is available in over 538 languages and dialects spoken throughout the world (Africa, Asia, The Far East, South America, Europe, etc.) Our Heart Book is now also available on cell phones, tablets, etc from www.angp-hb.co.za

Le livre du "Coeur de l'homme" peut etre obtenu en plus de 538 langues et dialectes parles dans le monde entier, a savoir: Afrique, Amerique, Asie, Extreme Orient, Europe. Notre Livre du Coeur est maintenant aussi disponible sur votre Telephone cellular, plaques, etc. de www.angp-hb.co.za

Este livro "O Coracao do Homem" e obtfdo em mais de 538 linguas e dialectos falados em todo o mundo, a saber: (Africa, Asia, America do Sul, Extremo Oriente, Europa, etc). O nosso Livro O Coração do Homem tambem esta agora disponivel em telefone celular, tablets, etc. de www.angp-hb.co.za

The 10 heart pictures contained in this booklet are also available in the form of large coloured picture charts (86 x 61cm) bound together in a set of 10 pictures. These "Heart Charts" can be obtained with European or African features and are particularly suitable to be used in conjunction with the Heart Book for class-teaching, open air evangelization etc. Kindly contact us to ascertain the latest subsidized price of this chart.

Les 10 images du coeur qui figurent dans ce livre peuvent etre obtenues en tableaux de couleur, format 86 x 61 cm, avec des physionomies europeennes ou africaines. Ils peuvent etre utilises en meme temps que le livre du coeur pour des classes bibliques, a l'ecole du dimanche ou lors de reunions de plein air. Soyez aimable de nous contacter pour assurer les derniers prix en cours du tableau.

As 10 imagens do coracao, contidas neste livro podem ser obtidas num conjunto de 10 imagens em colorido no tamanho de (86 x 61 cm). Estes "Cartazes do Coracao podem ser obtfdos com caracterfsticas Europeias e Africanas e podem ser usados em conjuncao com o mesmo livro em classes de ensino biblico, evangelizacao ou ao ar livre. Agradecemos que nos contacta- se para confirmacao do ultimo preco dos cartazes.



Kindly write to us if you are able to assist us with further translations of our free Gospel literature, informing us of the language into which you could translate this Gospel literature. Your assistance would be appreciated.

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

Nous vous invitons a nous contacter pour faire des arrangements concernant de nouvelles traductions de notre litterature, nous informant de la langue dans laquelle vous pouvez traduire cette litterature evangelique. Votre aide sera beaucoup appreciee.

Si vous avez trouve le salut en Christ ou si vous avez ete beni par notre litterature, nous vous prions de nous le faire savoir. Nous aimerions remercier Dieu avec vous et prier pour vous.

Nos vos convidamos a nos contactar, afim de fazer qualquer arranjo concernente a novas traducoes de nossa literatura em outras lnguas. Vossa assistencia sera muito apreciavel.

Se tem encontrado a salvacao em Cristo, ou se tem sido abençoado por intermedio da nossa literatura evangelica, faca o favor de nos informar. Pois nos gostaríamos de agradecer a Deus juntamente convosco, e lembra-lo sempre em nossas oracoes.



For free Gospel literature, books and tracts in over 538 languages, write to:

Pour obtenir gratuitement de la litterature evangelique, des livres et des traites en plus de 538 langues, ecrivez a:

Para obter gratufamente a literatura evangelica, livros e folhetos em mais de 538 lnguas diferentes escreva para:

ALL NATIONS GOSPEL PUBLISHERS

P.O. Box 2191

PRETORIA

0001

R.S.A.

A Gospel Literature Mission financed by donations

Une Mission de litterature evangelique financee de dons

Missao de literatura Evangelica financiada por donativos

(Reg. No. 1961/001798/08)